

恆

言

錄

恒言錄卷三

嘉定錢大昕及之纂

親屬稱謂類

稱父曰大人

史記陶朱公中男殺人囚於楚告其少子往視之
長男曰弟有罪大人不遣乃遣少弟漢書高帝奉
玉卮爲太上皇壽曰始大人常以臣亡賴不能治
產業不如仲力

鑑案說苑曾子曰曩者參得罪於大人大人用力教參得無疾乎

稱母曰大人

漢書宣元六王傳張博令弟光云王遇大人益解

師古注大人博自稱其母也史記刺客列傳將欲
爲大人麤糲之費正義引韋昭云古者名男子爲
丈夫尊父嫗爲大人古詩云三日斷五匹大人故
言遲是也後漢書范滂傳滂白母曰惟大人割不
可忍之恩

稱父曰老子

今人謂父曰老子按後漢書馬援傳援爲隴西太
守諸曹時白外事輒曰此丞掾之任何足相煩頗
哀老子使得遨遊是老子爲長老之通稱晉書孝
友傳潘綜與父驃共走避賊驃年老行遲賊轉逼

驃驃亦請賊曰兒年少自能走今爲老子不去老子不惜死乞活此兒則似對其子言之矣老學庵筆記西陲俚俗謂父曰老子

帝生案漢書韓康傳此自老子與之

稱父曰爹

廣雅爹父也曹憲音大可反南史梁始興王憺傳始興王人之爹赴人急如水火何時復來哺乳我爹徒我切廣韻爹北方人呼父亦音徒可切今轉爲丁加切

劉應李翰墨全書稱呼門父母稱爹爹媽媽

稱父曰爺

古人只用耶字南史王彧子綯年五六歲讀論語

周監于二代外祖何尚之戲之曰可改耶耶乎文

哉郁與顏氏家訓云梁世費旭詩云不知是耶非

殷濤詩云颺颺雲母舟簡文曰旭既不識其父濤

又飄颺其母是梁世未嘗有爺字也玉篇爺以遮

切俗爲父爺字木蘭詩阿爺無長男卷卷有爺名

本當作耶字杜子美兵車行耶孃妻子走相送自

注云古樂府不聞耶孃哭子聲但聞黃河之水流

濺濺卽是引木蘭詩初不作爺可證木蘭詩爺字

乃後人所改又杜北征詩見耶背面啼亦不作爺

稱母曰孃

南史竟陵王子良傳武帝與裴后不諧遣人船送
后還都已登路子良時年小在庭前不悅帝謂曰
汝何不讀書子良曰孃今何處何用讀書木蘭詩
不聞耶孃喚女聲廣韻孃母稱隋書韋世康與子
弟書況孃春秋已
高溫清宜奉鑑案北史隋宗
室傳阿孃不與我一好婦女

稱母曰婆

廣韻婆齊人呼母莫兮切今俗轉莫牙切唐書李
賀傳賀

呼母言曰阿婆老且病
賀不願去婆即婆字

稱父曰家君

後漢書列女傳家君獲此固其宜耳晉書袁宏傳

何故不及家君又家君勲跡如此

鑑案此始見易及墨子尚同篇

稱人之父曰尊公

劉表遺袁譚書尊公殂殞四海悼心

三國志袁紹傳注

書劉聰載記尊公雖不達天命簡文帝紀致意尊公袁宏傳尊公稱謂非下官敢專又云我已盛述尊公亦有稱尊君者晉書王述傳此尊君不肯耳

府君

漢人謂郡守爲府君亦曰明府後漢書高獲傳太守鮑昱謂獲獲曰府君但爲主簿所欺朱暉傳前阮府君有求於我謂太守阮況也劉平傳郡守孫

萌被創號泣泣請曰願以身代府君酷吏傳嗟我
樊府君安可再遭值西南夷傳益州太守張翕有
遺愛拜其子湍爲太守夷人懽喜奉迎道路曰郎
君儀貌類我府君後湍頗失其心有欲叛者諸夷
耆老相曉語曰當爲先府君故遂以得安濟北先
賢傳戴宏爲郡督郵曾以職事見詰府君欲撻之
三國志杜畿傳人生有一死不可負我府君華陀
傳廣陵太守陳登病佗脉之曰府君胃中有蟲數
升太史慈傳稱孔融爲府君士燮傳袁徽與荀彧
書稱交趾士府君夏侯湛昆弟詰稱其父爲我后

府君湛父莊爲淮南太守故也洪氏隸釋所載濟
陰太守孟郁稱孟府君魯相韓勅稱府君宏農太
守袁逢孫璆樊毅稱袁府君孫府君樊府君漢中
太守王升稱王府君桂陽太守周憬稱周府君巴
郡太守張納稱張府君安平相孫根稱孫府君巴
郡太守樊敏稱樊府君梁相費汎稱費府君趙相
雍勸稱雍府君益州太守高頤楊宗稱高府君楊
府君北海相景某稱景府君又孔耽神祠碑云郡
將烏程沈府君高彪碑云舉將潁川太守南陽文
府君郡守廬江范府君梁休碑稱太守安平趙府

君夏承碑東萊府君之孫皆稱守相爲府君也惟
韓勅後碑所云故少府卿任城樊府君豹非守相
而稱府君與它碑異洪氏以爲當是魯之前相者
是也都尉比二千石略與郡守同故交阯都尉神
道亦稱沈府君也漢時郡國辟掾屬如公府故郡
縣謂之府寺漢書馮奉世傳郡檄謂之府檄後漢劉平傳序而太
守稱府君魏晉以下猶然晉武帝追祭征西將軍
豫章府君潁川府君京兆府君與宣皇帝景皇帝
文皇帝爲三昭三穆宣帝曾祖父景豫章太守祖
雋潁川太守父防京兆尹也故皆稱府君而征西

獨稱將軍尚有別也然永和二年有司奏稱征西
豫章潁川三府君領司徒蔡謨議亦稱四府君則
征西亦稱府君矣宋書禮志高祖開封府君曾祖
武原府君皇祖東安府君皇考處士府君七世右
北平府君六世相國掾府君開封武原皆縣令而
相國掾處士亦冒府君之稱自後士大夫家敘其
先世亦皆通稱府君矣

家父 家母 家祖

顏氏家訓曰昔侯霸之子孫稱其祖父曰家公陳
思王稱其父爲家父母爲家母潘尼稱其祖曰家

祖古人之所行今人之所笑也及南北風俗言其
祖及二親無云家者田里假人方有此言耳凡與
人言已世父以次第稱之不云家者以尊於父不
敢家也凡言姑姊妹女子子已嫁則以夫氏稱之
在室則以次第稱之言禮成他族不得云家也子
孫不得稱家者經

字疑誤

略之也

兒子

史記齊悼惠王世家高后兒子畜之漢書高帝紀
鄉者夫人兒子皆以君

孩兒

書康誥傳愛養人如安孩兒赤子後漢書公孫述傳孩兒老母口以萬數

子息

戰國策老臣賤息舒旗史記高祖本紀臣有息女願爲季箕帚妾此息字所出也北史魏太武帝紀詔自三公已下至於卿士其子息皆詣太學其百工伎巧騶卒子息常習其父兄所業不聽私立學校唐契苾明碑後題孤子息特進上柱國涼國公嵩立

稱世父叔父爲伯叔

古人以伯叔爲長幼之稱伯父伯兄伯舅伯姊伯
子皆伯也叔父叔舅叔子皆叔也叔父伯父將伯
助予皆儕輩之稱漢以前未有稱諸父爲伯叔者
魏晉以後乃有之晉書庾峻傳君二父孩抱經亂
獨至今日尊伯爲當世令器二父謂伯父與父也南史江祐
傳江厥年十二聞收至謂家人曰伯旣如此無心
獨存劉顯傳族伯獻儒學有重名梁宗室傳伯爲
天子父作揚州康絢傳伯元隆父元撫魏書楊昱
傳尊伯性剛不伏理此稱伯父爲伯也晉書鄭袤
傳賢叔大匠垂稱于陽平王湛傳卿家癡叔死未

王徽之傳亡叔一時之標謝元傳亡叔臣安南齊
書竟陵王子良傳北瞻吾叔前望吾兄南史沈昭
略傳家叔晚登僕射猶賢於尊君以卿爲初蔭徐
孝嗣傳賢叔若同無今日之恨此稱叔父爲叔也
稱妾母曰姨

今人稱本生之妾母曰姨攷南史齊衡陽王鈞所
生母區貴人病左右以五色餅飴之不卅食曰須
待姨差又晉安王子懋母阮淑媛病危篤請僧行
道有獻蓮華供佛者子懋流涕禮佛曰若使阿姨
因此和勝願諸佛令華竟齋不萎則其來已久矣

叔母曰嬭

張耒明道雜錄云經傳中無嬭姁二字嬭字乃世
母字二合呼姁乃舅母字二合呼也案今人但呼
叔母爲嬭嬭乃叔母二字之合耳周必大歸廬陵
日記過廿姁廿八姁宅

常生案見呂祖
謙紫微雜記

家兄

魏略文帝常言家兄孝廉自其分也江表傳諸葛
亮書與陸遜曰家兄年老而格性疏晉書庾翼與
王羲之書云忽見足下答家兄書

羲之傳

謝元傳家

兄不改其樂何充傳家兄在郡定佳魏書李崇傳

家兄聞此必重相報北史楊休之傳家兄亦不知
吾是才士也

家姊

顏氏家訓引蔡邕書集呼其姑女爲家姑家姊北
史高道穆傳家姊行路相犯深以爲愧

家叔

三國志諸葛恪傳近見家叔父表陳與賊爭競之
計南史沈昭略傳家叔晚登僕射陶淵明歸去來
詞序家叔以余貧苦遂見用爲小邑

舍弟

能改齋漫錄兄稱弟曰舍弟亦有所本魏文帝與
鍾繇書曰是以令舍弟子建因荀仲茂時從容喻
鄙旨

令兄 令弟

令兄令弟之稱蓋本於詩角弓此令兄弟語北史
楊約傳令兄之弟果堪大用宋書廬江王瑋傳司
徒休仁等並各令弟謝靈運酬從弟惠連詩末路
值令弟杜子美詩亦稱其弟曰令弟如令弟草中
來送從弟亞也令弟尚爲蒼水使送鄉弟韶也令
弟雄軍佐過行軍六弟宅也今惟稱人之弟則曰

令弟

稱兄曰哥

白居易祭浮梁大兄文稱大哥明皇與寧王憲書
稱大哥又有同玉真公主過大哥園池詩

鑑案亦見廣韻

同胞

漢書東方朔傳同胞之徒無所容居蘇林曰胞音
胞胎之胞言親兄弟

堂兄弟

舊唐書中宗紀封堂兄左金吾將軍鬱林郡公千
里爲成紀郡王通典載宋庾蔚之說今人謂從父

昆弟爲同堂又家通典有同堂姊堂姑堂外甥堂
姨舅之稱蓋六朝人猶稱同堂唐時省去同字

宗兄

王維詩舍弟官崇高宗兄此削髮

族長

士喪禮族長泣卜

稱妻曰內人

案檀弓公父文伯之喪內人皆行哭失聲注云內
人妻妾非專言妻也周禮內宰歲終則會內人之
稍食注內人主謂九御又內小臣正內人之禮事

閹人凡內人無帥則幾其出入寺人掌王之內人之戒令皆指九御也南史蔡景歷傳陳高祖崩景歷躬共宦者及內人別營斂服唐書邢文偉上孝敬皇帝云三朝之後與內人獨居歐陽公歸田錄太祖於禁中見內人鏡背有乾德之號杜甫詩曰內人紅袖泣張祜詩曰內人已唱春鶯囀凡此類皆指宮人而崔令欽教坊記伎女入宜春院謂之內人則又通於伎人之承應者矣南史徐勉在袁昂處宴求昂出內人傳杯梁簡文帝有詠內人晝眠又夜遣內人還後舟又見內人作臥具徐君蒨

有初春攜內人行戲又共內人夜坐守歲詩大率
皆謂妾御爾今人則專稱妻爲內人矣

稱妻曰兒母

公羊傳陳乞日常之母注常陳乞子重難言其妻
故云爾疏曰正以妻者已之私故難言之似若今
人謂妻爲兒母之類是也

稱妻曰渾家

稱妻曰渾家見鄭文寶南唐近事史虛白詩風雨
揭却屋渾家醉不知尤袤淮民謠無錢買刀劒典
盡渾家衣

稱妻曰室人

詩室人交徧謫我箋云在室之人如賓之初筵所云室人入又耳非專指其婦也禮記昏義和於室人注室人謂女姻女叔諸婦也是新婦謂其同室之人猶詩云宜其家人也列子歸而告之室人室人謂夢認人鹿江淹有悼室人詩似爲夫指婦之稱矣

夫婦相稱曰外內

夫婦相稱曰外內晉魏以前無之如秦嘉顧榮皆有贈婦詩不云贈內也梁徐悱有贈內詩又有對

房前桃樹詠佳期贈內詩其妻劉氏有答外詩內
外之稱起於是矣

小妻

今人稱妾爲小妻按漢枚乘傳乘在梁時取皐母
爲小妻外戚傳許后姊嬪與定陵侯淳于長私通
因爲之小妻是也又漢書元后傳好酒色多取傍
妻後漢書光武紀奴婢下妻又依託爲人下妻是
亦稱傍妻下妻矣

鑑案說文娶者
也一日小妻也

稱子婦曰媳

劉跂學易集有穆府君墓誌云女嫁唐誦我姑之

媳

夫之兄曰伯

按爾雅釋親婦稱夫之兄爲兄公夫之弟曰叔兄公之公或書作妣讀爲鍾玉篇之容切容齋三筆云婦人呼夫之兄爲伯於書無所載嘗爲弟婦作青詞云頃因兄伯出使夫婿從行偶憶爾雅改爲兄公是兄伯之稱沿自宋代矣

夫之弟曰小叔

釋親云夫之弟爲叔史記蘇秦傳見季子位高金多也譙周曰蘇秦字季子索隱曰按其嫂呼小叔

爲季子耳未必卽其字

娘子

北史祖珽傳老馬年十歲猶號駟駒姦耳順尚稱娘子唐書平陽昭公主引精兵萬人號娘子軍又楊太真得幸宮中號娘子儀體與皇后等周必大茶山啟殯祝文稱皇妣安人王氏二十七娘子此稱其母曰娘子也朱文公祭劉氏妹稱亡妹五十六娘是娘之稱輕於娘子矣溫公書儀古稱父爲阿郎母爲娘子裴氏書儀與妻書某狀通幾娘子足下於禮亦似未妥若無封邑宜稱其字爲是

小娘子

宋世以小娘子女子未嫁者之稱吳自牧夢梁錄
議親弟幾位娘子黃魯直求親啟賢第幾小娘又
求魏氏親啟賢第三十九娘子孫仲益求親啟令
愛小娘江程萬繫臂啟令女小娘子劉屏山聘啟
令女小娘又稱令小娘子又啟令妹小娘子楊廷
秀聘啟亦稱某人小娘子劉應李翰墨全書婚啟
式第幾院令愛小娘子女家草帖式本宅幾位幾
小娘子

常生案昌黎集祭女挈文稱小娘子
搜神記只此小娘子便是大夫冤家

女子稱姐

能改齋漫錄婦女以姐爲稱子也切近世多以女
兄爲姐蓋尊之也劉應李翰墨全書婚禮女告廟
祝文稱女孫第幾姐

稱妻之兄弟曰舅

唐書朱延壽傳楊行密妻延壽姊也行密曰得舅
代我無憂矣五代史四夷附錄蕭翰之妹嫁德光
契丹呼翰爲國舅元史忠義傳桂完澤與其妻弟
金德爲賊所執完澤呼曰金舅男子漢卽死不可聽賊
前梁玉繩警記所引予按不足釋親篇妻黨云姑之子爲甥
舅之子爲甥妻之兄弟爲甥姊妹之夫爲甥謂我

舅者我謂之甥既互稱甥亦可互稱舅矣乃後世妻之兄弟獨得舅名蓋從其子女之稱遂相沿不覺耳晉人每稱壻爲郎舅世俗因有郎舅之語諺云至親莫如郎舅

家主

今鄉邨小民呼其妻曰家主嬖人皆嗤其俚俗然南史張彪傳章昭達迎彪妻便拜稱陳文帝教迎爲家主是家主之稱不爲無本也

女壻

王莽傳引光女壻甄邨後漢書楊震傳畱意少子

乞還女壻三國志趙達傳女壻昨來賀齊傳張雅
與女壻何雄

子壻

史記張耳陳餘傳禮甚卑有子壻禮鉅敬傳冒頓
在囚爲子壻後漢書吳漢傳述遣子壻史興柳子
厚祭楊憑詹事文自稱子壻稱憑丈人

丈人

野客叢書丈人字俗以爲婦翁之稱僕觀三國志
裴松之注獻帝舅車騎將軍董承句謂古無丈人
之名故謂之舅松之宋元嘉時人呼婦翁爲丈人

已見此時大昕按裴氏注云董承漢靈帝母董太后之姪於獻帝爲丈人古無丈人之名故謂之舅也裴所云丈人者唐人謂之表丈人今人所謂表叔也王氏據以爲婦翁之稱誤矣柳子厚祭其婦翁楊憑文稱丈人而自稱子壻蓋唐人乃有此稱丈母

顏之推家訓云中外丈人之婦猥俗呼爲丈母士大夫謂之王母謝母是凡丈人行之婦並稱丈母也通鑑韓滉謂劉元佐曰丈母垂白不可使更帥諸婦女往填官也注滉與元佐結爲兄弟視其父

爲丈人行故呼其母謂之丈母也今則惟以妻母爲丈母矣爾雅妻之母爲外姑

常生案此亦見
抱朴子雜記

姨母

漢書霍光傳光諸女遇太后無禮服虔曰光諸女自以於上官太后爲姨母遇之無禮通典晉袁準論曰從母時俗所謂姨母者也姊妹相謂爲姨故其子謂之姨子其母謂之姨母

姊妹

後漢書耿秉傳天子姊妹晉書荀顗傳幼爲姊妹陳羣所賞

姊妹

釋名兩壻相謂曰亞言並來女氏則姊夫在前妹夫在後亦相亞也漢書霍光傳延見姊夫昌邑關內侯吳志呂蒙傳依姊夫鄧當蜀志來敏傳敏隨姊夫奔荊州晉諸公贊甄德以世祖姊夫是以遂貴當世

妹夫

漢書王子侯表陸侯延壽坐知女妹夫亡命笞二百首匿罪免謝承後漢書胡母班王匡之妹丈三國志孫奭傳壹之妹夫也魏書宋繇傳妹夫張亨

宋弁傳弁父叔珍李敖妹夫

姑夫

蜀志李恢傳姑夫爨習爲建伶令南史范雲傳六歲就其姑夫袁叔明讀毛詩北史楊愔傳道人姑夫死也

友婿曰連襟

今人稱友婿曰連襟蓋有所本馬永卿嬾真子錄江北人呼僚婿曰連袂又呼連衿洪文敏容齋三筆載從兄在泉幕淮東使者其友婿也發京狀薦之爲作謝啟曰襟袂相連夙愧末親之孤陋雲泥

懸望分無通貴之哀憐皆用杜詩上句乃用李十
五丈云孤陋忝末親等級堪比肩人生意氣合相
與襟袂連此事適著題而與前送韋書記詩句偶
可整齊用之然則宋人已有此稱也能改齊漫錄
李參政昌齡
家女多得貴婿參政范公仲淹樞副
鄭公叡皆自小官布衣選配爲連袂

表兄

舊唐書崔湜傳湜表兄周利貞又酷吏傳利貞卽
湜之表兄權德輿戲贈表兄崔秀才詩別表兄韋
卿詩見萬首唐
人絕句李衛公與某侍郎帖自稱從表兄稱
其人爲侍郎十九弟鄴侯外傳在表兄鄭叔則家

北夢瑣言釜戴山前鹿又鳴此際多應到表兄表
兄不是嚴家子合是三兄與四兄是唐人稱表兄也

見太平
廣記

表弟

宋史文同傳蘇軾同之從表弟也朱文公祭鍾共
父樞密文自稱從表弟

表姪

舊唐書楊慎矜傳慎矜與鏐父璿中外兄弟鏐即
表姪杜子美有送重表姪王礪評事使南海詩太
平廣記記崔四事有表丈人表姪之稱表丈人即今

所謂表伯叔也朱文公爲徽猷閣待制劉子羽撰
神道碑自稱從表姪題於結
銜之上又祭汪尚書文自稱
從表姪

中表

後漢書鄭太傅明公將帥皆中表腹心周旋日久
三國志管寧傳中表愍其孤貧晉書山濤傳與宣
穆后有中表親庾亮傳臣于陛下后之兄也姻婭
之嫌實與中表骨肉不同列女傳禮儀法度爲中
表所則宋書自序中表孤貧悉歸焉南史沈慶之
傳悉移親戚中表於婁湖王志傳九歲居所生

憂哀容毀瘠爲中表所異王泰傳由是中表異之
裴子野傳子野於任昉爲從中表又外家及中表
貧乏所得奉悉給之傳季珪傳宋武帝之外弟以
中表厯顯官周書賀蘭祥傳與護中表少相親愛
祥爲字文護姑子北史盧元傳度世推計中表致其供卹
崔昂傳高德正是其中表劉芳傳崔先於芳有中
表之敬愚按中表猶言內外也姑之子爲外兄弟
舅之子爲內兄弟故有中表之稱鑑案隋書經籍
志有盧懷仁中
表實錄二十卷高諒表親譜四十卷
費鳳別碑中表之恩情兄弟與甥舅

友朋相稱兄弟

三國志臧洪謂袁紹曰洪親見呼張陳雷爲兄則
洪府君亦宜爲弟又馬良與諸葛亮書稱亮爲尊
兄蜀記關羽稱徐晃爲大兄江表傳呂蒙稱魯肅
爲大兄南史王僧綽謂中書侍郎蔡興宗曰弟名
位應與新建齊又荅江湛曰弟亦恨君不直范蔚
宗謂何尚之弟就死之後猶望君照此心也常生案後
漢書趙壹傳壹報皇甫規書曰實望仁兄昭其縣
遲又傳咸贈何劭王濟詩吾兄既鳳翔王子亦龍
飛

外甥

後漢書种暠傳河南尹田歆外甥王謚名知人范

滂傳滂外甥西平李頌三國志王凌傳外甥令狐

愚諸葛恪傳恪外甥都鄉侯張震常生案釋名妻

甥者生也此與尔
正同與後世異

外孫

史記游俠傳郭解善相人者許負外孫也鑑案尔

子之子爲外孫又儀禮喪服外孫注女子
子之子故詩展我甥兮毛傳外孫曰甥

祖先

三國志毛玠傳祖先有罪參同契孫紹祖先

家長

詩侯主侯伯毛傳云主家長也漢書昭帝紀令民

得以律占租如淳曰律諸當占租者家長身各以其物占占不以實家長不身自書皆罰金二斤沒入所不自占物及賈錢縣官也鑑案墨子天志上篇若處家得身於家長猶有鄰家所避逃之又管子立政篇若在宗長子弟臣妾屬役賓客則里尉以譙於游宗游宗以譙於什伍什伍以譙於長家長蓋卽家長

親戚

左傳親戚爲戮不可以莫之報也孟子人莫大焉亾親戚君臣上下史記堯二女不敢以貴驕事舜親戚甚有婦道曲禮兄弟親戚稱其慈也正義云親指族內戚言族外鑑案左傳封建親戚以蕃屏周室史記箕子者紂親戚也

親家

荀子非相篇棄其親家而欲奔之者比肩竝起續
漢書禮儀志百官四姓親家婦女王符潛夫論權
臣必以親家魏末傳王淩少子明山投親家食親
家告吏三國志注隋書李穆傳吾宗社幾傾賴親家公而
獲全耳房陵王勇傳劉金驎諂佞人也呼定興作
親家翁輟耕錄凡男女締姻者兩家相謂曰親家
此二字見唐蕭嵩傳今北方以親字爲去聲按盧
綸作王駙馬花燭詩云人主人臣是親家則是亦
有所祖親家又曰親家翁引五代史馮道事不知

隋以前已有親家翁之稱矣常生案後漢書應奉傳注汝南記至親家

李氏堂令人以他辭請朗

親眷

三國志毛玠傳親自詣玠屬所親眷常生案鮑照別庾郎中詩

已經江海別復與親眷違

眷屬

史記樊噲傳大臣誅諸呂告須婁屬索隱云婁音

眷南齊書江革傳傍無眷屬

忝眷

水東日記載南宋景定中鄭氏婚書主婚人稱忝

眷下署銜名

鄉親

晉書阮籍傳於是鄉親共喻之皇甫謐傳鄉親勸
令應命魏舒傳不爲鄉親所重陶潛傳其鄉親張
野及周旋人羊松齡等或有酒邀之宋書文五王
傳薦致鄉親徧布朝省北史令狐整傳率鄉親二
千餘人

常生案宋書翟法傳又云
雖鄉親中表莫得見也

家屬

史記陳涉世家誅趙王將相家屬五宗世家徙王
勃以其家屬處房陵呂不韋列傳其與家屬徙處

蜀淮南王列傳皆徙其家屬朔方之郡平準書賈
人有市籍者及其家屬皆無得籍名田以便農漢
書地理志家屬徙焉盧綰傳詐論它人以脫勝家
屬綰悉將其宮人家屬騎數千居長城下淮陽王
欽傳因爲博家屬徙者求還後漢書安帝紀客死
無家屬朱暉傳與外氏家屬從田閒奔入宛城第
五倫傳遂將家屬客河東桓譚傳皆徙家屬于邊
鍾般傳卽將家屬東至洛陽楊終傳家屬徙邊逢
萌傳歸將家屬浮海蔡邕傳遂攜將家屬三國志
張邈傳畱超將家屬屯雍邱公孫度傳乃將家屬

入於海邠原傳原將家屬入海管寧傳遂將家屬
浮海還郡田疇傳疇盡將其家屬及宗人三百餘
家居鄴司馬朗傳將家屬還本縣母邱儉傳私出
將家屬逃走吳三嗣主傳李勣及徐存家屬皆伏
誅潘夫人傳紹興家屬送本郡廬陵全夫人傳尚
將家屬徙零陵呂蒙傳得羽及將士家屬韓當傳
將母家屬部曲男女數千人孫靜傳靜將家屬與
策會于錢塘陸遜傳將家屬來者使就料視王蕃
傳徙蕃家屬廣州

鑑案管子立政篇凡過黨其在家屬及於長家

家口

宋書元凶傳劭欲殺三鎮士庶家口北史崔巨倫傳并竊家口以歸裴矩傳驍果之徒盡無家口楊愔傳罪止一身家口不問常生案家口即孟子八南史張敬兒傳迎家口悉至下都北史盧同傳遣賊家口三十人并免家奴為良房分

魏書太武五王傳往世房分畱居京者得上品通官常生案漢書石奮傳入子舍師古注曰諸子之舍若今言諸房矣

過房

元史刑法志諸乞養過房男女者聽奴婢過房良民者禁之

居父母憂稱孝子

後漢書靈帝紀市賈民爲宜陵孝子者數十人皆
除太子舍人蔡邕傳今虛僞小人本非骨肉而羣
聚山陵假名稱孝桓思皇后祖載之時東郡有盜
人妻者亾在孝中後漢石刻如武梁碑云孝子仲
章季章季立种氏石虎云孝子种覽元博所造三
國志諸葛恪傳有孝子著縗衣入其閤中晉書王
綏父愉爲殷桓所捕綏未測存亾在都有憂色居
處飲食每事貶降時人每謂爲試守孝子南齊書
周盤龍傳我若不沒虜則應破虜兒不作孝子便

當作世子也卞彬傳外閒有童謠云可憐可念尸
著服孝子不在日代哭南史宋明恭王皇后傳帝
欲加酖害令太醫煮藥左右止之曰若行此事官
便作孝子豈得出入狡獪鑑案禮雜記祭稱孝子
孝孫劉熙釋名祭曰卒
哭止孝子無時之哭也期而小祥孝子除首經也
又期而大祥孝子除練服也閒月而禫孝子之意
渾然
衰也

爲人後者稱其父爲世叔叔父

古禮爲人後者爲其父母降服期無改稱世父叔
父之義惟漢晉春秋載審配與袁譚書云昔先公
廢紉將軍以續賢兄上告祖靈下書譜牒先公謂

將軍爲兒子將軍謂先公爲叔父見三國志袁紹傳注此是一證然本初溺愛少子以致敗亡未必稽於典禮也

男女皆稱處子

孟子踰東家牆而摟其處子趙邠卿云處子處女也潛夫論交際篇使處子雖苞顏閔之賢苟被褐而造門人猶以爲辱而恐其復來況其實有損者乎又云富貴雖新其勢日親貧賤雖舊其勢日除此處子所以不能與官人競也後漢書逸民傳論處子耿介羞與卿相等列東哲補白華詩堂堂處

子無營無欲李善云處子處士也此皆男子之稱也
鑑案莊子藐姑射之山有神人居綽約若處子亦即司馬法所云始如處女也故潘岳射雉賦云來若處子此指女而言

官人

潛夫論交際篇今使官人雖兼桀跖之惡苟結駟而過士士猶以榮而歸焉又云此處子所以不能與官人競也
杜田杜詩博議謂官人乃隋唐間語北史梁彥先傳舊唐書高祖武宗紀可證不知漢人已有此語

徒弟

陳後山詩徒弟三千子

鑑案高誘呂覽注徒謂弟子也又華嚴音義引司馬

彪莊子注同
此徒弟所出

友生 晚生

朱存理鐵網珊瑚錄貞溪諸名勝詞翰皆元時筆
札也其紙尾署名有云晚契生紫陽方回頓首拜
有云眷生張端莊肅奉書有云友生王逢頓首再
拜有云臨川晚學生邾堅肅呈有云鄉末惟善上
有云友弟錢應庚再拜有云眷晚生邵亨貞頓首
九拜有云契弟邵亨貞再拜有云友弟亨貞昔有
云東郭姻末錢抱素稽首拜呈今友生友弟之稱
惟以施之門下士而契生契弟絕無稱者

常生案
邵氏聞

見錄吳內翰點狀元及第歸謁范文正曰某晚生偶得科第願授教至友生見詩雖有兄弟不如友生

小生

漢書朱雲傳小生乃欲相吏耶師古曰小生謂其新學後進張禹傳新學小生亂道誤人宜無信用唐宋人有自稱小生者元微之云小生自審不能過之又云小生于章句中櫟櫨榱桷之材盡曾量度李陽冰云斯翁之後直至小生韓昌黎詩嗟我小生值強伴蘇東坡云小生有令嚴鼙鼓云云皆自謙之詞也元人傳奇賓白稱小生本此

家生子

吳人稱僕之子爲家生子按漢書注奴產子猶今人云家生奴也白樂天詩蒼頭碧玉盡家生柳子厚與蕭翰林書家生小童自然曉曉晝夜滿耳常生

案免驪山徒人奴產子見陳勝傳

漢子

輟耕錄今人謂賤丈夫曰漢子按北齊魏愷自散騎常侍遷青州刺史固辭文宣帝大怒曰何物漢子與官不就鑑案此條亦見老學庵筆記又陶九成引成式廬陵官下記有研朱漢子之語

小的

今奴婢下人自稱小的卽宋時所謂小底也宋史
有入內小底內班小底內殿直小底騎御馬小底
吳越備史亦有入內小底遼史有近侍小底承應
小底筆硯小底常生案宋史會要至道二年九月
帝閱試所擇兵士號騎試射中六
十人以殿前小底爲軍額又晉公談錄
皇城使劉承規在太祖朝爲黃門小底

奴才

晉書載紀鐺元海曰穎不用吾言遂自奔潰真奴
才也水經注李特至劔閣歎曰劉氏有如此地而
面縛於人豈不奴才也晉書作庸才北史尒朱榮傳葛

榮之徒本是奴才

丫頭

輟耕錄吳中呼女子之賤者曰丫頭劉賓客寄贈
小樊詩花面丫頭十三四春來綽約向人時

賸子

輟耕錄賸子賤娼濫婦之稱

鑑案丁度集韻从女作娥

佃戶

晉書王恂傳魏氏給公卿已下租牛客戶數各有
差自後小人憚役多樂爲之貴勢之門動有百數
又太原諸部亦以匈奴胡人爲田客多者數千武

帝踐位詔禁募客食貨志官品第一至于第九各
以貴賤占田又得蔭人以爲衣食客及佃客其應
有佃客者官品第一第二者佃客無過五十戶第
三品十戶第四品七戶第五品五戶第六品三戶
第七品二戶第八第九品一戶

客作

魏略焦先飢則出爲人客作飽食而已不取其直
能改齋漫錄云江西俚俗罵人曰客作兒吳氏但
引宋人詩不知漢魏已有此語也鑑案漢書匡衡
傳邑大姓多書
衡乃與客作而不求價又高士傳
夏農入林慮山中爲冶工客作

你

隋書李密傳共你論相殺事何須作書語耶五行
志武平元年童謠曰狐截尾你欲除我我除你二
年童謠曰和士開七月三十日將你向南臺北史
李幼廉傳我教你好長史處許善心傳我好欲放
你隋書同突厥傳你能作幾年可汗廣韻你乃里切
秦人呼傍人之稱

木匠

論衡量知篇能斲削柱梁謂之木匠能穿鑿穴埴

謂之土工

鑑案陶穀清異錄木匠總號
運斤之藝又曰手民手貨

酒保

史記樂布傳賃傭于齊爲酒人保漢書樂布傳爲酒家保孟康云酒家作保庸也可保信故謂之保後漢書杜根傳爲宜城山中酒家保注廣雅云保使也言爲人傭力保任而使也鵠冠子酒保先貴食者注酒保貨酒者也

常生案後漢書李燮傳又作燮名姓爲酒家傭傭卽

保也

廚子

廚子火頭皆宋時語見夢梁錄

常生案南史何承天傳東方曼倩發

憤于侏儒遂與火頭倉子稟賜不殊

坐婆

今婦人免身時必有養娘扶持俗云坐婆按六一

居士集記宮婢韓蟲兒事云召醫官產科十餘人

坐婆三人坐婆之名始見於此

輟耕錄世謂穩婆曰老娘穩婆即坐

婆也鑑案倦遊錄苗振就館職晏相曰宏稍溫習振曰豈有三十年爲老娘而倒紉孩兒者乎則謂穩婆爲老娘其來舊矣

水手

通典江南百姓不習河水皆轉顧河師水手更爲

損費

鑑案大業雜記龍舟下一重長秋內侍及乘舟水手以青絲大條繩六條兩岸引進東坡

詩便合與官充水手此生何止略知津

房客

蘇東坡詩蒜山幸有閒田地招此無家一房客

富翁

論衡初稟篇富家之翁貲累千金生有富骨治生積貨至於年老成爲富翁矣

義父母義子孫

會稽志俚俗有義父母義子孫義兄弟

常生案洛陽伽藍記

隱士趙勉云汝南王聞而異之拜爲義父

恆言錄卷三

恆言錄卷四

嘉定錢大昕及之纂

仕宦類

閣老

唐書百官志中書舍人以久次者一人爲閣老判

本省祿事

鑑案李肇國史補宰相相呼爲堂老兩省相呼爲閣老杜子美將赴成都草堂

途中寄嚴鄭公詩
生理祇憑黃閣老

修撰

唐書百官志史館修撰四人掌修國史又開元八

年麗正殿加修撰校理判正校勘官

文獻通考修撰之名始於

唐常生案舊唐史裴坦常爲史館修撰

檢討

唐書百官志集賢院增修撰官校理官待制官留

院官知檢討官

常生案舊唐書王彥威以淹議典禮由太常卿特令補檢討

都堂

通典尚書省都堂居中左右分司自注舊唐書令有大廳當省之中今謂之都堂按唐宋時以尚書省爲都堂明時各處巡撫皆帶都察院堂上官銜世亦稱爲都堂名同而實異也

三法司

通典事有大者則詔下尚書刑部御史臺大理寺
同案之亦謂此爲三司推事今以刑部都察院大
理寺爲三法司蓋出於此常生案商子定分篇天
子置三法官而魏書長
孫道生傳道生廉約身爲三
司而衣不華飾食不兼味

州尊

蜀志秦宓傳宜一來與州尊相見州尊謂州牧劉
璋也鑑案白居易詩身爲
百口長官是一州尊

巡檢

通典中郎將各四人分掌諸門以時巡檢北史司
馬子如傳以北道行臺巡檢諸州守令已下

貴州

蜀志杜微傳猥以空虛統領貴州晉書周浚傳貴州雖武豈能獨平江東江統傳貴州人士有堪應此者否張軌傳吾視去貴州如脫屣耳

貴郡

晉書潘京傳貴郡何以名武陵

尊府

後漢書朱穆傳皆託之尊府南史庾萼傳府是尊府州是萼州

上司

漢人稱三公爲上司後漢書劉愷傳今上司缺職
未議其人又云皆去宰相復序上司楊震傳吾蒙
恩居上司皆謂三公也史弼傳若承望上司誣陷
良善三國志崔林傳以不事上司左遷河閒太守
符璽華譚傳與上司多忤范甯傳府以統州州以
監郡郡以莅縣如今互相領帖則是下官反爲上
司是上官通稱上司矣鑑案陸雲蒼兄平原詩仍
世上司芳流慶純鍾會移
蜀將吏士民傲位爲上司寵秩殊
異則晉時猶不以爲上官通稱

老爺

今百姓稱官府曰老爺爺者呼父之稱以是稱者

尊之也宋史宗澤傳北方聞其名常尊憚之對南
人言必曰宗爺爺岳飛傳金所籍兵相謂曰此岳
爺爺軍爭來降附孟宗政傳金人呼爲孟爺爺元
董搏霄傳我董老爺也

職

今言吏見所屬上司自稱卑職按元史河渠志有
卑職參詳及卑職至真州等語知賤牘公移相沿
久矣常生案元文類陳天祥論盧世榮姦邪狀曰卑職等在內外百司之間伺察非違知無不

料

歷

封氏聞見記朝廷百司諸廳皆有壁記原其作意
蓋欲著前政履歷而發將來健羨也宋史選舉志
詔臨軒所選官吏竝送中書門下考其履歷審取
進止職官志嘉定十二年詔兩經作令滿替者實
歷考有政聲無過犯舉員及格改官人特免再
作縣許受簽判或幹官以當知縣履歷鑑案魏
書源子
據其履歷清華則家累
輕今來歸化何其孤迥

舊唐書食貨志官銜之內猶帶此名白樂天詩官
銜俱是客曹郎常生案家語禮運篇官有銜職有
序王肅注銜治也封氏見詞記官

銜之名當是選曹補授須存資歷聞奏之時先具舊官名品十前次書擬官于後使新舊相銜不斷故云

鄉貫

隨書食貨志其無貫之人不樂州縣編戶者謂之浮浪人唐書選舉志以所試雜文鄉貫三代名諱送中書門下舊唐書職官志凡戶之兩貫者先從邊州爲定次從關內次從軍府州若注者各從其先貫焉

脚色

宋史選舉志局官等人各置脚色周必大奉詔錄

偶檢永寧脚色見其方是秉義郎又奏議先令吏房取見本人脚色所云脚色者猶今之履歷也鑑案朝野類要初入仕必具鄉貫三代名銜謂之脚色

後漢書劉陶傳但更相告語莫肯公文魏略公文

下遼東

三國志公孫度傳注

舊唐書職官志凡施行公文應

印者監印之官考其事目無差然後印之

常生案三國志

趙儼傳公文下郡綿綿悉以還民又北蘇綽傳所行公文綽皆為之條式

任

見音現

後漢書陳忠集尚書見任重於三公

議處

晉書刑法志刑書之文有限而舛違之故無方故有臨時議處之制

起復

晉書卞壺傳遺繼母憂既葬起復舊職累辭不就元帝遣中使敦逼壺牋自陳云云帝以其辭苦不奪其志服闋爲世子師通典武德二年崔善爲奏比爲時多金革頗遵墨經之義丁憂之士例從起復無識之輩不復戚容如不糾劾恐傷風俗又中書舍人歐陽通起復本官每入朝必徒跣至城門

外然後著韡襪而朝在省則席地藉藁非公事不言亦未啟齒國朝奪情者多矣唯通能合其禮五代史劉岳傳初鄭餘慶嘗採唐士庶吉凶書疏之式雜以常時之禮爲書儀兩卷明宗見其有起復之制歎曰儒者所以隆孝弟而敦風俗且無金革之事起復可乎乃詔刪定之古人云起復者卽後世所謂奪情也今以服闋爲起復失之矣鑑案南史蕭坦之居母喪起復爲領軍將軍此亦指奪情而言至宋史向子諲坐言者降三官起復知潭州則今之所謂起復矣

事故

周禮小行人凡此五物者治其事故五物謂札喪
凶荒師役福事禍哉也唐會要太和八年御史臺
奏常參官舊例每月請兩日事故假今許請三日
韓退之上張僕射書非有疾病事故輒不許出

交代

漢書戶后傳交代之際蓋寬饒傳及歲盡交代後
漢書班超傳與超交代傳燮傳與燮交代白虎通
萬物所交代之處也

王伯厚云交代
出蓋寬饒傳

條陳

漢書李尋傳臣謹條陳所聞

引見

漢書兩龔傳徵爲諫大夫引見于定國傳引見丞相御史佞幸傳引見東廂張敞傳天子引見敞王商傳單于來朝引見白虎殿後漢書趙熹傳卽徵熹引見入爲太僕此皆天子引見臣下也而後漢書范升奏記王邑曰願蒙引見極陳所懷儒林傳右扶風瑯琊徐業亦大儒也聞于諸生試引見之三國志臧洪傳邈卽引見洪與語大異之則引見之語通於儕輩矣

告示

荀子仁者好告示人王伯厚云告示出荀子後漢書賈琮傳

即移書告示三國志呂凱傳重承告示常生案後漢書隗囂

傳騰書隴蜀告示禍福

本章

漢書王嘉傳上于是定躬寵告東平本章

保舉

三國志何夔傳又可修保舉故不以實之令鑑案陶宏

景華陽頌動靜顧
朽錄不負保舉恩

三避

漢書趙廣漢傳見事風生無所迴避蓋寬饒傳

舉無所迴避後漢書光武紀吏雖逗畱迴避劉陶
傳有敢迴避與之同罪

關防

曹植文皇帝詠願衰經以輕舉兮迫關防之我嬰

宋史選舉志乃命諸郡關防于投卷之初

鑑案明太祖實

錄朕初于文籍設關防印記者本以絕欺蔽防奸
偽特一時權宜爾果正人君子焉用是爲此則印
記之始

常川

今章奏公文多用之于見明永樂實錄有常川操

練之語

仰

孔平仲雜記今公家文字用仰字北史時已有此語北齊孝昭皇帝紀詔定三恪禮儀體式亦仰議之子按楊椿傳仰所在郡縣四時以禮存問安否祖珽傳奉并州約束須五經三部仰承親檢校催遣趙修傳其家宅作徒卽仰停罷亦上行下之詞也

差

楚皆切

晉書潘岳傳又差吏掌主依客舍收錢王羲之傳上命所差上道多叛家戶空盡差代無所北史畢

稟

義雲傳兼差臺吏二十人蠕蠕傳計沃野懷朔二
川鎮各差二百人令當鎮軍主監率給其糧仗送
至前所按爾雅釋詁差擇也詩旣差我馬毛公亦
訓爲擇本是采擇之義今以出使爲差蓋本於此

書說命篇臣下罔攸稟命左氏傳稟命則不威後
漢書皇后紀內外詒稟事同成人吳漢傳裨將虜
掠不相承稟常生案晉書王渾王濬傳論上稟廟
堂下憑將士宋史石保吉傳臣受命
禦患上稟成算此
後世用稟所自

參

唐書百官志有常參官六參官能改齋漫錄下見
上謂之參蓋始於戰國時也戰國策秦王欲見頓
弱頓弱曰臣之義不參拜王能使臣無拜即可矣
明代始有參劾糾參之語今竟以參當劾字矣常生

案漢書天文志太歲在巳太
初在參罰參罰之義取此

調

廣韻徒弔
切選也

漢書匡衡傳衡射策甲科以不應令除爲太常掌
故調補平原文學師古注調選也後漢書宗均傳
調補辰陽長校古人所云調者只是試選之義唐
時進士任子初授官皆稱調非如今人以更換爲

調也張端義貴耳錄仕之不稱者許郡將或部使
者兩易其任謂之對移此卽漢書所云換也換縣見薛
宣宋時尚稱移不稱調
鑑案後漢書馬融傳融頌奏忤鄧氏滯於東觀十年不得調

選舉類

狀元

進士第一人稱狀元自唐以來未之有易予嘗讀
周益公省齋文集有回第二人葉狀元適啟回第
三人李狀元寅仲啟是第二人第三人亦稱狀元
也據言狀元與同年相見後便請一人爲錄事舊

例率以狀元爲錄事狀元已下到主司宅門下馬
綴行而立

榜眼

宋史陳若拙傳當時以第二人及第者爲榜眼若
拙素無文故目爲瞎榜王元之送第三人朱巖先
輩從事和州詩有云榜眼科名釋褐初是第三人
亦稱榜眼也

科第

撫言有統序科第一篇又云三百年科第之盛

宋史

通典初秀才科第最高試方略策五
條有上上上中上下中上凡四等

科甲

揮塵錄韓忠獻億既薨仲文子華玉汝相繼再中

科甲

同年

唐國史補進士互相推敬謂之先輩俱捷謂之同

年漢時稱同舉孝廉者曰同歲生

常生案唐書憲宗問李絳曰人

于同年固有情乎鑑案通鑑合孤楚與皇甫鎛同年進士故鎛引楚爲相

座主

唐國史補有司謂之座主張籍寄蘇州白使君詩

登第早年同座主撫言會昌三年奉宣旨不欲令

及第進士呼有司爲座主

鑑案舊唐書令狐岵傳衛州刺史田牧岵知舉時進

士門生也聞岵來喜曰始見座主迎謁之禮甚厚又全唐詩話會昌三年十二月二十日中書覆

奏奉宣旨不欲令及第士呼有司爲座主

狀頭

據言張又新時號張三頭謂進士狀頭宏詞勅頭

京兆解頭鄭合敬詩最是五更殘醉醒時時聞喚

狀頭聲

鑑案說諸唐崔元翰中京兆解頭禮部狀頭宏詞勅頭制科三等勅頭

解元

唐時諸州解送進士居首者謂之解元亦曰解頭

據言有爭解元一篇江西鍾傳於考試之辰設會

供帳解元三十萬解副二十萬

探花

撫言狀元與同年相見後便請一人爲錄事其餘

主宴主酒主樂探花主茶之類咸以其日辟之

案天中記唐進士杏園初會謂之探花宴以少俊
二人爲探花使遍遊名園若他人先折得名花則

二人
破罰

膳錄

文獻通考大中祥符八年始制膳錄院景祐四年

詔開封府國子監及別頭試封彌膳錄如禮部

案能改齋漫錄仁宗時有糊名攷核之律雖號至
公然未絕其弊其後袁州人李夷賓上言請別加

膳錄因著爲令又宋選舉志膳錄院始置于祥符八年澠水燕談錄廷試彌封膳錄始于景德祥符之閒鑑案唐書選舉志元和十三年禮部侍郎奏復攷功別頭試別頭試者卽今之迴避卷也

卷子

文獻通考策論逐場旋考則卷子不多

鑑案何維騏宋史新

編理宗朝科目之弊曰傳義曰換卷曰易號曰卷子出外日膳錄滅裂寶慶二年詔防戢焉

鼎甲

唐國史補四姓惟鄭氏不離滎陽有岡頭盧澤底李士門崔家爲鼎甲薛廷珪授韋韜光祿卿制鼎甲華宗是鼎甲爲望族之稱今人以進士第一甲者爲鼎甲未審起於何時按唐摭言韋甄及第年

事勢固萬全矣然未知名第高下志在鼎甲又于
稅廣明初崔厚侍郎膺貴主力取鼎甲則唐時固
有此稱也蓋唐制明經有甲乙丙丁四科進士則
甲乙二科然武德以來明經唯有丁第進士唯有
乙科故甲科爲鼎甲非于甲科又分等也宋時始
分爲三甲其後增至五甲李心傳繫年錄黃真舉
進士爲四川類省試榜首用鼎甲恩授職

秀才

風俗通孫卿有秀才善爲詩禮易春秋之學

此太
平御

覽所引今本
風俗通無之

史記賈生傳吳廷尉爲河南守聞其

秀才召置門下儒林傳卽有秀才異等輒以名聞
洪容齋曰秀才之名自宋魏後實爲貢舉科目之
最今人聞以稱之輒指爲輕己閱北史杜正元傳
隋開皇十五年舉秀才試策高第曹司以策過左
僕射楊素素怒曰周孔再生尚不得爲秀才刺史
何忽妄舉乃以策抵地不視時海內惟正元一人
舉秀才曹司重以啟素素志在試退正元乃使擬
相如上林賦王褒聖主得賢臣頌班固燕然山銘
張載劍閣銘白鸚鵡賦曰我不能爲君住宿可至
未時令就正元及時並了素讀數過大驚曰誠好

秀才命曹司錄奏蓋其重如此正元弟正藏次年
舉秀才唐書杜正倫傳云隋世重舉秀才天下不
十人而正倫一門三秀才皆高第乃此也容齋三筆常生
案管子小匡篇農之子常爲農樸野而不慝其秀才之能爲士者則足賴也

監臨

漢律吏受所監臨以飲食免

景帝紀

又有見知故縱

監臨部主之法史記張耳陳餘傳監臨天下諸將

鑑案監臨部主之法見漢書刑法志又晉陽秋劉宏爲荊州都督諸軍事詔以宏壻夏侯陟爲襄陽太守乃荆屬郡也宏表陟姻親舊制不得相監臨

監試

後漢書和熹皇后紀躬自監試三國志司馬朗傳
監試者以其身體壯大疑朗匿年

覆試

後漢書黃瓊傳覆試之作將以澄洗清濁覆實虛
濫不宜改革

題目

論衡正說篇正題目龕龕之說以照篇中微妙之
文吳書薦述後進題目品藻曲有條貫三國步
騰傳注晉
書山濤傳甄拔人物各爲題目此題目二字之始
也梁書武帝紀中大通五年行幸同泰寺設四部

大會高祖升法座發金字摩訶般若經題陳書尚
祖紀永定二年與駕幸莊嚴寺發金光明經題唐
撫言神龍元年方行三場試故常列詩賦題目於
榜中高郢就府解後試官別出題目曰沙洲獨鳥
賦鑑案三國志臧霸傳裴注武帝百官名不知誰撰皆有題目又南史王僧虔傳往年取三國志聚牀頭百目許汝曾未窺其題目

破題

撫言韋彖畫狗馬難爲功賦其破題曰有丹青二
人一則矜能於狗馬一則誇妙於鬼神裴令公居
守東洛夜宴半酣公索聯句時公爲破題

常生案李肇國

史補李程試日五色賦既出闔楊於陵見其
破題云德動天鑒祥開日華許以必擢狀元

搜檢

南齊書豫章王嶷傳搜檢皆已亡去梁書賀琛傳
家家搜檢其細已甚南史郭祖琛傳搜檢姦惡不
避強禦

法禁類

罪名

漢書刑法志二千石官以其罪名當報之

干證

宋史刑法志詔諸鞠獄追到干證人無罪遣還者

每程給米一升半錢十五文

緣坐

隋書刑法志其緣坐則老幼不免

招

舊唐書哀帝紀勅僞稱官階人泉州晉江縣應鄉貢明經陳文巨招伏罪款付河南府決殺宋史刑法志品官命婦在禁別具單狀合奏案者具情款招伏奏聞又云監勒招承催促結款

供

宋史刑法志據文及甫等所供言語又云或以供

款未圓而不呈

款

說文款意有所欲也詩老夫灌灌毛傳灌灌猶款款也疏云言日至誠款實而告之是款爲誠實之義凡讞獄者欲得其實情故隋書刑法志凡繫獄者不卽荅款應加測罰魏書李崇傳各自款引宋書范蔚宗傳倉卒怖懼不卽首款梁書何遠傳望立三七日不款北史蘇瓊傳悉獲實驗賊徒款以辛公義傳罪人聞之咸自款伏其荅款之詞謂之款案宋史刑法志孝宗臨軒慮囚率先數日令

司進款案披閱是也今人以一事爲一款雖不涉

獄訟者亦謂之款失其義矣

常生案文選注引字林款誠也意有所欲

又一切經音義引蒼頡款誠重也至也

忤逆

淮南齊俗訓不犯禁而失不忤逆而進後漢書伏

湛傳忤逆天心郅惲傳忤逆陰陽陳蕃傳忤逆者

中傷楊秉傳有忤逆於心者必求事中傷三國志

高堂隆傳豈憚忤逆之災

鑑案忤說文作悟悟逆也漢書劉向傳集注忤

猶逆也

偷盜

漢書張敞傳長安市偷盜尤多後漢書虞詡傳人

偷盜者次之論衡荅佞篇偷盜與田商同知

卽智字常

生案淮南子道應篇偷者天下之盜也

夾帶

宋史食貨志嚴立輒踰疆至夾帶私鹽之禁

冤枉

書梓材傳無令見冤枉後漢書虞延傳譖延多所

冤枉仲長統昌言冤枉窮困不敢自理三國志步

騭傳張于廷尉民無冤枉

常生案廣雅釋言冤枉也

冤屈

楚詞懷沙撫情效志兮冤屈而自抑北史隋宗室
諸王傳面申冤屈論衡二子冤屈太史公列記其
狀常生案漢書武帝紀息夫躬傳小顏集注皆言
冤屈也說文冤屈也从兔从口兔在口下不得
走諡屈折

罪過

周禮秋官大司寇凡民民之有罪過而未麗於法
而害於州里者荀子遠罪過者也史記秦始皇本
紀以罪過連逮呂后本紀誣以罪過蒙恬列傳求
其罪過舉劾之信陵君列傳自言罪過漢書蕭望
之傳及言許史子弟罪過王吉傳坐在國時不舉

保辜

奏之罪過常生案後漢書班超傳亦云塞外吏士本非孝子順孫皆以罪過徒補邊屯此皆就官司而言至北史長孫晟傳晟見牙中艸穢責令染干除之染干曰奴罪過又由吾道榮傳戒本恆岳仙人有少罪過爲天官所謫則已如今人之私言矣鑑案易君子以赦過宥罪

唐律諸保辜者手足毆傷人限十日以他物傷者二十日以刃傷者三十日折跌肢體及破骨者五十日史游急就章疔瘡保辜詭呼號師古曰保辜者各隨其狀輕重令毆者以日數保之限內至則坐重辜也公羊傳鄭伯髡原何以名傷而反未至乎舍而卒也注古者保辜君親無將見辜者辜內

當以弑君論之辜外當以傷君論之疏云其弑君論之者其身梟首其家執之其傷君論之者其身斬首而已罪不累家漢律有其事

鑑案說文婢保任也

和姦

通典有亭長姦部人者縣言和姦

謝夷吾

件作

宋時執役葬事者謂之件作方宅伯宅編近歲除直祕閣者尤多運判蔣彝應副朱冲葬事得之號件作學士是也今制州縣設件作專司檢驗民人鬪毆死傷蓋沿明代之稱

苦主

元史刑法志諸殺人者死仍於家屬徵燒埋銀五十兩給苦主謂被殺之家屬也今俗猶沿此稱

一起

今官司審理詞訟每一案謂之一起考元史刑法

志諸捕盜官盜賊三限不獲強盜三起竊盜五起

各笞一十七強盜五起竊盜十起各笞二十七強

盜十起竊盜十五起各笞三十七則起數之稱其

來久矣

常生案齊書崔懷慎等傳論流風一起人倫毀薄一起與一案雖別然語言之流弊

有自始

不知情

漢書楊雄傳雄不知情有詔勿問鮑宣傳宜不知情宋子京謂情上疑有其字蓋未讀漢律也後漢書孔融傳漢律與罪人交關三日已上皆應知情犯禁

周禮司門凡財物犯禁者舉之川澤犯禁者執而誅戮之淮南齊俗訓不犯禁而入鑑案大戴禮曾子立事篇不犯其禁

犯夜

通典更鋪失候犯夜失號唐律諸犯夜者笞二十

閉門鼓後開門鼓前行者皆爲犯夜疏引宮衛令
五更三籌順天門擊鼓聽人行晝漏盡順天門擊
鼓四百槌訖閉門後更擊六百槌坊門皆閉禁人
行

賭錢

廣雅賭齔也通俗文錢戲曰賭

一切經音義引

韋曜博奕

論至或賭及衣物抱朴子子素惡賭博而今盛行
此戲唐律諸博戲賭財物者各杖一百賭飲食者
不坐疏云謂卽雖賭錢盡用爲飲食者亦不合罪
鑑案顏氏漢書注博六博也揜意錢之屬也皆戲
而賭取財物李善文選注引埤蒼亦云齔齔也此

廣雅之
所出

貨財類

錢財

莊子錢財不積則貪者憂史記張儀傳親兄弟同
父母尚有爭錢財漢書江都易王非傳受人錢財
薛宣傳賊取錢財數十萬

財物

史記龜策傳能得名龜者財物歸之荀子重財物
而制之財物貨寶以大爲重百事廢財物屈禮者
以財物爲用通流財物粟米無有滯留使國家足

用而財物不屈淮南原道訓散財物焚甲兵

財利

淮南汜論訓惑于財利之得

財帛

漢書外戚傳財帛之省

寶貝

京氏易傳木人金鄉居寶貝木華海賦積太顛之

寶貝

鑑案元史百官志諸路金玉人匠總管府秩正三品掌造寶貝金玉易億喪貝千寶注貝

寶貨

也

經紀

能改齋漫錄江西人以能幹運者爲佳經紀唐已
有此語滕王元嬰與蔣王皆好聚斂太宗嘗賜諸
王帛勅曰滕叔蔣兄自能經紀不須賜物予按北
史盧文偉傳經紀生資常若不遺致財積聚承侯
寵愛而遺下絕則北魏人已有此語經紀二字見淮南子鑑案禮記月令毋失經紀荀子儒效篇然而通乎財萬物養百姓之經紀

營生

陸機樂府善哉膏粱士營生與且博南齊書蕭景
先傳力少更隨宜買麤猥奴婢充使不須餘營生
鑑案莊子大宗師釋文引崔注常營其生爲生生

盤纏

蕭千巖樵夫詩一擔乾柴古渡頭盤纏一日頗優

游歸來澗底磨刀斧又作全家明日謀鑑案文獻通考長典

元年見錢每貫十文
稗草每束一文盤纏

鋪陳

周禮司几筵注鋪陳曰筵太師注鋪陳今之政教

善無禮記儒行注鋪陳往古堯舜之善道以待聘

召長生後唐史上賜宰相李愚錢百
緡鋪陳物十三件此見史之始

開市

易林升之大壯開市作喜建造利事

交易

易交易而退各得其所

產業

韓非子外不事利其產業史記蘇秦傳周人之俗
治產業漢書高帝紀不能治產業東方朔傳以子
貧民無產業疏廣傳頗立產業基址

糧食

左傳楚師遯遠糧食將盡孟子師行而糧食淮南
道應訓糧食未及乏絕也漢書朱買臣傳治樓船
備糧食

市井

孟子在國曰市井之臣國語處商就市井莊子徐

無鬼篇商賈無市井之事則不比

常生案白虎通論言因井爲市

故曰市井應劭風俗通言人至市有所鬻賣者當于井上洗濯令潔乃到市也後漢書循吏傳自首不入市井注引春秋井田記云因井爲市交易而退故稱市井

放債

容齋五筆今人出本錢以規利入俗語謂之放債又名生放子攷之亦有所來漢書谷永傳云至爲人起責分利受謝顏師古注言富賈有錢假託其名代之爲主放與他人以取利息而共分之此放

字所起也

賒

周禮泉府凡賒者祭祀無過旬日喪紀無過三月

鄭司農云賒賁也後漢書劉盆子傳少年來沽者

皆賒與之

常生案史記高祖紀常從王媼武負賁酒顏注引韋昭曰賁賒也二字互爲訓

裝載

詩出車箋召御夫使裝載物而往三國志孫綝傳

皆令裝載

費用

荀子孰知夫出費用之所以養財也

鑑案漢翼奉傳國家之費

當數代
之用

多餘

莊子列御寇篇多餘之贏

平分

史記穰苴列傳身與士卒平分糧食

常生案謝靈運撰征賦總

九流以貞觀協五材而平分又楚詞
皇天平分四時兮竊獨悲此凜秋

抽分

宋史食貨志或有貨物則抽分給賞

腳錢

羅願新安志稱腳錢者每貫出錢五十以備解發

案朝野僉載監察御史李喬請米送不
脚錢幾令史目御史例不還脚車錢
脚錢以貴畜

運脚

通典其運脚出庸調之家任和顧送達

鑑案舊唐書食貨志

江淮等苦變造之勞河路增轉輸之弊每計其運脚數倍加錢

利市

利市之語陶九成謂出於易說卦傳然說卦實以
近利爲句市三倍爲句市三倍者猶言賈三倍也
案左氏傳爾有利市寶賄易林入門笑喜與吾利
市此兩字連用之始歐陽公集古錄今俚俗賣茶

肆中多置一蓋偶人云是陸鴻漸至飲茶客稀則
以茶沃此偶人祝其利市北夢瑣言夏侯攷未偶
伶俦風塵時人號曰不利市秀才撫言以京兆爲
榮美以同華爲利市又曰同華解最號利市

生活

生活字本出孟子今人借作家計用魏書胡叟傳
我此生活似勝焦先南史臨川王宏傳阿六汝生
活大可北史祖瑩傳文章須自出機杼成一家風
骨何能其人同生活也尉景傳與爾計生活孰多

帳簿

漢書武帝紀太初元年受計於甘泉宮師古曰受
郡國所上計簿也若今之諸州計帳後漢書光武
紀遣使奉計注計謂人庶名籍若今計帳北史蘇
綽傳始制文案程式朱出墨入及計帳戶籍之法
隋書食貨志文帳出入復無定簿舊唐書職官志
兵曹參軍事二人掌兵士簿帳差點等事騎曹參
軍事掌馬驢雜畜簿帳及牧養支料草粟等事唐
書百官志句會功課及畜養帳簿又云在署爲簿
在寺爲帳

鑑案唐書百官志又以男女
之黃小中丁老爲之帳簿

店

晉書阮修傳以百錢挂杖頭至酒店便獨酣暢員
興宗記采石瓜州大戰始末道旁茶坊酒店官軍
閑坐夢梁錄汴京熟食店張挂名畫所以勾引觀
者常生案古今注店置也所以置貨鬻
者物也宋讀曲歌飛龍落藥店南史劉
休傳休婦王氏妬明帝聞之令于宅後開小店使
王氏親賣皂荚婦帚以辱之又隋書李德林傳并
覓莊店作替又取高阿那肱衛國
縣市店八十壠為王謙宅作替

行

舊唐書食貨志其百姓有邸店行鋪又自今已後
有因交關用欠陌錢者宜但令本行頭及居停主
人牙人等檢察送官都城紀勝市肆謂之行客因

官府科索而得此名不以其物大小但合充用者

皆置爲行

鑑案周禮肆長疏一肆立一長使之檢校一肆之事若今行頭者也文獻通攷

熙寧六年納免行錢方得在市賣易不赴官自投行者有罪

鋪

舊唐書食貨志其百姓有邸店行鋪又若一家內

別有宅舍店鋪並須計用在此數又先於淄青兗

鄆等道管內置小鋪唐李涉詩都市廣場開大鋪

宋有米鋪肉鋪香鋪藥鋪

見夢梁錄常生案唐張籍詩得錢只了還書鋪

牙

舊唐書食貨志市牙各給印紙人自買賣隨白署

記有自貿易不用市牙者給其私簿盧杞傳市主

人牙子各給印紙

常生案舊唐書安祿山傳祿山爲互市牙郎

恒言錄卷四